

Тәрәнә ургъциг геедрлт угагъар хурадж авхин төлә

Эн джил танъгъчин колхоз-мудар болн совхозмудар, тер дотр Западн болн Яшалтинск райодар тәрәнә ургъц цань уга сән. Эн ургъциг геелт угагъар хурадж авхин төлә колхозмудин болн совхозмудин механизатормуд шунлтта кевәр ноолдджацхана.

Тәрә хуралгън эклснәс авн хурта чиигтә цаг болад бәәв. Тегәд комбайнар хурадж, цокдж авсн чиигтә буудяг дахн хагсадж, цеврлдж государствд орулдж өгх керг агъу ик чинр зүүджәнә. Тер төләд хурадж авсн буудяг дакдж хурт норгъл уга, хагсадж авхин төлә Яшалтинск района «Новый мир», «Заветы Ильича», Ленинә нертә болн нань чигн колхозмуд, совхозмуд цуг бәәх эв-аргъан күүцднъ олзджацхана.

Хур-чиг тату өдрмүдт лафетн жатксин машинистнр, комбайнермүд, трактористнр тәрәг хаддж, унгдаджана. Делгү хадад унгдачксн тәрәг нарн халагъад, салькнд хагсн бийәрнъ өдр-сө гилго цуглулдж авчана.

Келхд, Яшалтинск района «Заветы Ильича» колхоз (ах-лачнъ үр И. И. Синявский) 2430 гектар намрар тәрсн хар болн цагъан тәрә хурадж авх зөвтә. Терүнәснъ 600 гектар хадад унгдачкв. Керм хур-чиг орл уга бәәсн цагт, цуг тәрәг 4-5 хонгин эргцд хадад унгдачкад, хагсн бийәрнъ комбайнар 10 хонгин эргцд хурадж, цокдж авх аргъ колхозд бәәнә.

Эн колхозин 1-ч номертә комплексн бригадин (бригадирнъ И. Е. Ганшин) машинистнр үр Гавриленко, Круглин болн Березовский лафетн жаткар өдр болгън 25-30 гектар тәрә хадна. Одрә кемджәгъән давулн күүцәсн агрегатд 50 арслнъ, өдртән 25 гек-

тар тәрә цокдж авсн комбайна агрегатд 75 арслнъ мора өдр болгън өгхмн гидж колхозин правлень болн парторганизац шиидцхәдж. Ода эн колхозин тәрә хуралгънд 8 лафетн жаткс орлцджана.

«Новый мир» колхозин (ах-лачнъ үр Кулак) 1-ч номертә комплексн бригад—бригадирнъ үр Н. Г. Копейка, тәрә хуралгъна түрүн өдрмүдт өдр болгън 270-300 гектар тәрә хаддж унгдажав. Хагсу өдрмүдт өдр-сө гилго кәдлдж, хадсн тәрәг комбайнар хурадж, цокдж йовна. Комбайнас буудяг автомашигъәр зогсл уга механизированн токур зөөнә. Механизированн ток деер авч ирсн буудяг дахн цеврләд, автомашигъәр Сальск элеваторур зөөдж, государствд өгчәнә.

Эн колхоз 3 минъгън центнер буудя государствд орулад өгчкв.

Эн колхозин 2-ч номертә комплексн бригадин (бригадирнъ үр Иваненко) машинистнр үр Ефименко өдртән 25 гектар, Могильный Иван — 35 гектар, нань чигн машинистнр өдрә кемджәгъән давулдж күүцәцхәнә. Комбайнер үр Кузьменко гектар болгънас 230 центнер буудя цокдж авчана. Нам зәрм газр 35 центнер буудя өгхмн. 4-ч номертә комплексн бригад деер бәәх ток йоста кевәр механизировать кесн учрар, оln кәдлмшчнр керглгддјәхш, энүнд гурвхн күн кәдлнә. Комбайнас кедү ик буудя ирв чигн, дахн хагсагдад, цеврлгдәд, элеваторур зөөдж, государствд орулдж өггднә.

Ода Яшалтинск района колхозмуд болн совхозмуд 10 минъгъ гар гектар тәрәг хадад унгдачкв. Терүгән дахн цокдж авхин төләд, буудян комбайнс цуг өдр-сө кәдлджәнә.

А. ДЖЕВАЛДЫКОВ.